



CONVENIO ENTRE A AXENCIA GALEGA DE DESENVOLVEMENTO RURAL E A ASOCIACIÓN VECINAL DE DONÍS PARA A CONCESIÓN DUNHA SUBVENCIÓN DIRECTA AO PROXECTO SENLLEIRO "CONSTRUCCIÓN DUNHA ÁREA RECREATIVA NA CONTORNA DE DONÍS", DENTRO DA CATEGORÍA DE PROMOCIÓN E POSTA EN VALOR DA CONTORNA NATURAL DA COMARCA.

Santiago de Compostela, na data da sinatura electrónica.

REUNIDOS

Dunha parte, María Paz Rodríguez Rivera, directora xeral da Axencia Galega de Desenvolvemento Rural, en virtude do nomeamento realizado polo Decreto 132/2024, do 20 de maio, (DOG nº 97 de 21 de maio de 2024) actuando en virtude do seu expresado cargo, e no exercicio das facultades delegadas polo acordo do Consello de Dirección, do 17 de xuño de 2026 (DOG núm. 112, do 17 de xuño).

Doutra parte, Marcia Leticia Pereira Palomino, na súa condición de presidenta da Asociación vecinal de Donís, con CIF G67978791, en virtude do acordo adoptado pola asemblea xeral da Asociación en data 25 de febreiro de 2026.

Ambas as dúas partes teñen plena capacidade para levar adiante este convenio e,

EXPOÑEN

Primeiro.- Que ambas as dúas entidades son conscientes da necesidade de favorecer as condicións da contorna rural para a mellora da calidade de vida da poboación. Manter a funcionalidade dos elementos e espazos con valor cultural e social e devolverlles o uso que tiñan para que a veciñanza os recupere e goce, así como o tratamento integral da súa contorna, é fundamental para acadar unha mellora nas condicións de socialización e interrelación das parroquias rurais de Galicia. Todo isto, dende a premisa principal de garantir a existencia das infraestruturas básicas e de mellorar a estrutura do territorio para poder fixar a poboación do rural galego.

Segundo.- Que a Axencia Galega de Desenvolvemento Rural (en adiante, a Axencia) creouse pola disposición adicional sexta da Lei 5/2000, do 28 de decembro, de medidas fiscais e de réxime orzamentario e administrativo (DOG núm. 251, do 29 de decembro).

A dita lei de creación está modificada, entre outras, pola Lei 11/2021, do 14 de maio, de recuperación da terra agraria de Galicia (DOG núm. 94, do 21 de maio), en cuxo artigo 6 configúrase á Axencia como unha axencia pública autonómica, de conformidade coa Lei 16/2010, do 17 de decembro, de organización e funcionamento da Administración xeral e do sector público autonómico de Galicia, coa consideración de medio propio e servizo técnico da Comunidade Autónoma de Galicia, que actúa como instrumento básico na promoción e coordinación do desenvolvemento do territorio rural galego, co obxectivo





de mellorar as condicións de vida dos seus habitantes e de evitar o seu despoboamento a través, entre outras, das medidas de recuperación da terra agroforestal de Galicia reguladas na citada Lei 11/2021.

A Axencia está adscrita á Consellería do Medio Rural, ten personalidade xurídica e patrimonio propios, goza de autonomía administrativa e económica e posúe plena capacidade de obrar, tanto no campo do dereito público como no do dereito privado, para o cumprimento dos seus fins e con suxeición á normativa correspondente.

Entre as súas funcións está promover e poñer en valor no ámbito rural galego o patrimonio histórico, a recuperación da terra agraria, a contorna natural e os produtos agroalimentarios, xa que as actuacións sobre os ditos ámbitos contribúen a mellorar a calidade de vida e a cohesión da vida social e a estimular o arraigamento da poboación no medio rural, de xeito que fagan deste un lugar máis atractivo, ao ser as ditas actuacións interesantes dende o punto de vista do fortalecemento do orgullo rural, da diversificación económica, da potenciación do interese polo territorio e, polo tanto, do desenvolvemento xeral do territorio.

A Axencia no marco das súas competencias e dentro das súas accións estratéxicas, ven apoiando, mediante axudas directas a través de convenios, baixo a denominación de "proxectos senlleiros", diversas actuacións por entender que concorren nelas as características de especial relevancia para o desenvolvemento rural que as fan merecedoras de apoio económico.

Coa finalidade de prever, con carácter xeral, os requisitos para a concesión deste tipo de axudas, o 20 de abril de 2022 o Consello de Dirección da Axencia aprobou o Acordo polo que se fixan as regras de tramitación das axudas, mediante concesión directa a través de convenio, do Programa de Proxectos Senlleiros (<https://agader.xunta.gal/gl/axencia/transparencia-e-goberno-aberto/relevancia-xuridica/consello-de-direccion-de-agader>), modificado por acordo do 7 de novembro de 2022 do Consello de Dirección da Axencia polo que se modifica a regra 4ª "Entidades beneficiarias dos proxectos senlleiros" onde se engade como entidade beneficiaria dos proxectos senlleiros ás Comunidades de montes veciñais en man común (punto 4.2 do Acordo) (<https://agader.xunta.gal/gl/axencia/transparencia-e-goberno-aberto/relevancia-xuridica/consello-de-direccion-de-agader>).

As regras deste acordo conceptúan como proxectos senlleiros as actuacións sobre elementos e realidades merecedores dun recoñecemento especial, pola súa capacidade para contribuír á conservación de dúas finalidades esenciais: mellorar a calidade de vida da poboación e promover a fixación desta nas áreas rurais.

Terceiro.- A Asociación vecinal de Donís constitúese no ano 2021 como unha organización de natureza asociativa e sen ánimo de lucro ao amparo do disposto no artigo 22 da Constitución Española, na Lei Orgánica 1/2002, do 22 de marzo, reguladora do Dereito de Asociación e demais lexislación aplicable.

A Asociación, inscrita por resolución do 3 de decembro de 2021 na sección 1ª co número 2021/24836-1 no Rexistro Provincial de Asociacións de Lugo, ten personalidade xurídica propia e plena capacidade de obrar para realizar todos aqueles actos que sexan





necesarios para o cumprimento da finalidade para a que foi creada, con suxeición ao establecido no ordenamento xurídico.

A Asociación constitúese por tempo indefinido e o ámbito territorial no que desenvolve principalmente as súas actividades é a localidade de Donís (Concello de Cervantes) e arredores. Entre os fins principais da asociación está o de conectar aos veciños da zona, creando un entorno máis amable no que reunirse e socializar.

O 30 de abril de 2026 a Asociación vecinal de Donís presentou unha solicitude de colaboración a esta Axencia para financiar un proxecto senlleiro dentro da categoría Promoción e posta en valor da contorna natural da comarca.

Xunto coa solicitude achegou, entre outra documentación, a "*Memoria para a construción dun área recreativa no entorno de Donís, concello de Cervantes (Lugo)*", asinada polo enxeñeiro técnico forestal Miguel Ángel Martínez Pérez (colexiado núm. 757 del COETFG).

O proxecto pretende levar a creación dunha área recreativa na contorna do núcleo de Donís e ten como finalidade principal potenciar o desenvolvemento sostible da zona, poñendo en valor os seus recursos naturais e culturais.

Os obxectivos específicos que se pretenden acadar con esta actuación son:

- Fomentar o turismo rural e de natureza, ofrecendo un espazo atractivo para visitantes que buscan contacto coa paisaxe, tranquilidade e actividades ao aire libre, favorecendo así a dinamización económica do territorio.
- Mellorar a calidade de vida da veciñanza, proporcionándolles un espazo público para o lecer, a convivencia e a práctica de actividades saudables ao aire libre, favorecendo o benestar físico e social da poboación local.
- Conservar e valorizar o patrimonio natural e paisaxístico, mediante un deseño que respecte o entorno e promova a educación ambiental e o respecto polo medio.
- Reforzar a identidade local e o sentimento de pertenza, a través da recuperación e posta en valor de elementos tradicionais da zona, así como da creación dun punto de encontro para actividades culturais e sociais.
- Impulsar o asentamento de poboación, contribuíndo a fixar habitantes no rural ao dotar o territorio de infraestruturas atractivas e funcionais que melloren a súa calidade de vida.

De acordo co artigo 26 da Lei 9/2007, do 13 de xuño, de subvencións de Galicia, non é posible promover a concorrência pública para realizar esta actuación dada a necesidade de atender áreas específicas como a promoción e posta en valor da contorna natural da comarca. Ademais debido ao carácter puntual ou ocasional deste tipo de apoio e á vista das características concretas das actuacións previstas, non parece adecuado articular estas axudas a través dunha convocatoria pública, sendo a subvención directa a través dun convenio a fórmula que máis se adapta á natureza destas axudas.

En consecuencia, o citado proxecto ten cabida no Programa de proxectos senlleiros da Axencia, xa que, conforme ao citado Acordo do 20 de abril de 2022 do seu Consello de Dirección, contribúe a cohesionar a vida social no medio rural e a estimular o





arraigamento da poboación sobre o territorio no que habita nel mediante a consecución dos seguintes obxectivos:

- Preservación dos valores sociais e culturais do medio rural.
- Potenciación de elementos que recuperen ou manteñan a historia e a memoria da comarca.
- Dinamización da vida socioeconómica e cultural da zona.
- Mellora da relación social dos veciños.
- Satisfacción de necesidades e aspiracións da veciñanza.
- Mellora dos tecidos culturais, educativos e produtivos.
- Fortalecemento do orgullo e satisfacción de pertenza á comunidade rural beneficiaria do proxecto.
- Potenciación de elementos que recuperen ou manteñan a historia e a memoria da comarca.

En concreto, a actuación proposta reúne as características previstas na categoría D) da regra 3 do acordo do 20 de abril de 2022:

- a. Actuar en contornas declaradas como zona de especial protección polos seus valores naturais ou que formen parte da Rede galega de espazos protexidos (Lei 5/2019, do 2 de agosto, do patrimonio natural e da biodiversidade de Galicia).
- b. Mellorar a restauración, a conservación, a protección, o coñecemento, a divulgación ou o uso sustentable do patrimonio natural.

Por outra banda, a regra 4. do citado Acordo do 20 de abril de 2022 (modificado neste apartado polo Acordo de 7 de novembro de 2022 do Consello de Dirección da Axencia), sinala entre as posibles entidades beneficiarias das axudas para os proxectos senlleiros as entidades de participación cidadá: asociacións, confederacións, federacións ou unións de asociacións que se atopen inscritas no Rexistro de Asociacións da Comunidade Autónoma de Galicia.

Por último, o Acordo do 20 de abril de 2022 establece na regra 5. que o ámbito territorial de execución dos proxectos senlleiros será todo o territorio da Comunidade Autónoma de Galicia, agás:

- Nas provincias da Coruña e de Pontevedra, as entidades singulares de poboación (unidades de poboación) que superen os 6.000 habitantes.
- Nas provincias de Lugo e de Ourense, as entidades singulares de poboación (unidades de poboación) que superen os 10.000 habitantes.
- Os termos municipais dos Concellos de Vigo e da Coruña, tendo en conta que todo o territorio de ditos Concellos ten un alto grao de influencia urbana, derivada da presenza das dúas cidades galegas máis grandes.
- Os parques empresariais situados no territorio dos Concellos de Ourense, Santiago de Compostela, Lugo, Ferrol e Pontevedra.

Por todo o exposto con anterioridade, conclúese que o proxecto presentado pola Asociación vecinal de Donís para a creación dunha área recreativa na contorna do núcleo de Donís, dentro da categoría *"Promoción e posta en valor da contorna natural da comarca"*, cumpre cos criterios obxectivos e subxectivos necesarios que xustifican o financiamento desta actuación a través dunha subvención directa e motivan a súa formalización a través deste convenio.





Cuarto.- O artigo 19.4 da Lei 9/2007, de subvencións de Galicia, establece que poderán concederse de forma directa subvencións nas que se acrediten razóns de interese público, social, económico ou humanitario ou outras debidamente xustificadas que dificulten a súa convocatoria pública.

Como se pon de manifesto nos apartados anteriores, en cumprimento do establecido nos artigos 19 e 26 da Lei 9/2007, de 13 de xuño, de subvencións de Galicia, e no artigo 40 do Decreto 11/2009, do 8 de xaneiro, polo que se aproba o Regulamento da citada lei, os obxectivos que se perseguen con este convenio resultan de interese público, social e económico para o desenvolvemento rural, a través da categoría de proxecto senlleiro en que se encadra, conforme ao Acordo do 20 de abril de 2022 do Consello de Dirección da Axencia Galega de Desenvolvemento Rural (modificado polo Acordo de 7 de novembro de 2022) e están en consonancia coas medidas de impulso e apoio ao desenvolvemento rural levadas a cabo pola Axencia.

En concreto, e en relación ao proxecto de que se trata, as razóns que xustifican o interese social e público que dificultan a promoción da concorrencia pública son as seguintes:

A singularidade do proxecto presentado xustifícase porque nos atopamos ante a recuperación duna contorna declarada como zona de especial protección polos seus valores naturais que forma parte da identidade da comarca, mellorando a restauración, a conservación, a protección, o coñecemento, a divulgación e o uso sustentable do patrimonio natural.

En consecuencia, as partes asinan este convenio para a concesión dunha subvención directa, de acordo coas seguintes

CLÁUSULAS

PRIMEIRA.- Obxecto

O obxecto do presente convenio é a creación dunha área recreativa na contorna do núcleo de Donís, no concello de Cervantes, de acordo coas actuacións definidas na "*Memoria para a construción dun área recreativa no entorno de Donís, concello de Cervantes (Lugo)*", asinada polo enxeñeiro técnico forestal Miguel Ángel Martínez Pérez (colexiado núm. 757 del COETFG) e presentada pola Asociación vecinal de Donís o 30 de abril de 2026. Estas actuacións constitúen as necesidades prioritarias a acometer para garantir o seu uso con todas as garantías de seguridade, accesibilidade e disfrute por parte dos veciños da contorna.

SEGUNDA.- Actuacións a realizar

As actuacións a realizar son as que se relacionan na memoria presentada pola Asociación vecinal de Donís e ten como finalidade principal potenciar o desenvolvemento sostible da zona, poñendo en valor os seus recursos naturais e culturais.





En concreto, as actuacións a realizar son as seguintes:

- Roza e acondicionamento do terreo
- Peche perimetral
- Instalación de mobiliario
- Axardinamento

Ao abeiro do presente convenio, considéranse subvencionables os investimentos e gastos realizados polo beneficiario que estean encadrados nos conceptos que se detallan no Anexo I "Orzamento" e cumpran as condicións que se detallan na memoria presentada.

TERCEIRA.- Obrigas da Asociación vecinal de Donís

A Asociación vecinal de Donís comprométese a facer constar en toda a publicidade - tanto impresa como audiovisual- a colaboración da Axencia Galega de Desenvolvemento Rural e a Xunta de Galicia, para o que utilizará a normativa da imaxe corporativa da propia Axencia Galega de Desenvolvemento Rural.

Así mesmo, comprométese ao cumprimento das obrigas contidas na Lei 9/2007, do 13 de xuño, de subvencións de Galicia e, en especial, as recollidas no artigo 11 desta norma. Tamén será de aplicación o establecido no Decreto 11/2009, do 8 de xaneiro, polo que se aproba o Regulamento da Lei 9/1997, en canto non se opoña á lexislación anterior. Con carácter supletorio, será de aplicación o disposto na Lei 38/2003, xeral de subvencións, e no seu regulamento, aprobado polo Real Decreto 887/2006, do 21 de xullo.

A entidade beneficiaria deberá dar cumprimento as obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

A entidade beneficiaria ten a obriga de prestar colaboración e facilitar canta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma, ao Tribunal de Contas e ao Consello de Contas.

Antes de proceder á sinatura do convenio e do seu pagamento, a Asociación vecinal de Donís deberá acreditar estar ao día no cumprimento das obrigas tributarias e fronte á seguridade social e de non ter pendente de pagamento ningunha outra débeda coa administración pública da comunidade autónoma, segundo o establecido no artigo 10 da Lei 9/2007, de subvencións de Galicia, e no artigo 11 do Decreto 11/2009, polo que se aproba o regulamento da citada lei.

A sinatura deste convenio implica, de ser o caso, a autorización á Axencia para solicitar as certificacións acreditativas de que se atopa ao corrente das obrigas tributarias estatais e autonómica e da seguridade social, así como que non ten pendente de pagamento ningunha outra débeda, por ningún concepto coa Administración pública da Comunidade Autónoma de Galicia, segundo o establecido no artigo 10 da Lei 9/2007, de





subvencións de Galicia, e no artigo 11 do Decreto 11/2009, polo que se aproba o regulamento da citada lei.

A Asociación vecinal de Donís comprométese a destinar os fondos percibidos ao obxecto concreto para o que foron concedidos, polo menos durante un período mínimo de 5 anos, sempre e cando se trate de bens inventariables. A Axencia poderá comprobar, cando o considere pertinente, a execución das actividades obxecto deste convenio.

CUARTA.- Financiamento

O gasto total das actuacións propostas na "Memoria para a construción dun área recreativa no entorno de Donís, concello de Cervantes (Lugo)" a desenvolver pola entidade beneficiaria no marco do presente convenio, de acordo co orzamento previsto no Anexo I deste convenio, ascende a vinte dous mil cento catro euros con dezaioito céntimos (22.104,18 €), que será asumido polas partes asinantes na porcentaxe e importe que se indica a continuación:

• Axencia Galega de Desenvolvemento Rural	80%	17.683,34 €
• Asociación vecinal de Donís:	20%	4.420,84 €
TOTAL	100%	22.104,18 €

A achega da Axencia realizarase con cargo á aplicación orzamentaria que se indica a continuación:

Aplicación orzamentaria 2026 15.A1.712A.781.0 Código proxecto 2017-00003.-"Actuacións senlleiras de mellora do patrimonio rural"		TOTAL
Importe	2026	17.683,34€
	17.683,34 €	

A achega conveniada trátase dun importe certo, quedando por conta da entidade beneficiaria a diferenza de financiamento necesario para a total execución da actividade subvencionada, debendo ser reintegrado o financiamento público unicamente no caso e polo importe que supere o custo total e real da actividade, segundo o establecido no artigo 21.2 do Regulamento de subvencións de Galicia.

No importe indicado entenderase incluído o IVE, sempre e cando este supoña un custo real soportado pola beneficiaria, podendo ser considerado gasto subvencionable. Neste caso deberá presentarse un certificado relativo á situación da entidade beneficiaria respecto o IVE.

O importe da subvención aboarase logo da presentación da documentación xustificativa da realización das actuacións financiadas (presentada no prazo e coas condicións indicadas na cláusula correspondente do presente convenio) e da emisión do correspondente informe técnico favorable por parte da Axencia, que poderá recorrer, se o considera necesario, a o apoio de expertos externos.





En aplicación do artigo 63 do Decreto 11/2009, polo que se aproba o Regulamento da Lei 9/2007, do 13 de xuño, de subvencións de Galicia, a Axencia Galega de Desenvolvemento Rural poderá tramitarse un pagamento anticipado, que suporá a entrega de fondos con carácter previo á xustificación, ata un importe máximo do 50% da cantidade total subvencionada. A concesión do anticipo realizarase logo da solicitude da entidade interesada e mediante resolución motivada.

O artigo 65.1 do Decreto 11/2009 establece que os beneficiarios están obrigados á constitución de garantías cando se prevexa a posibilidade de realizar pagos a conta ou anticipados. Non obstante o anterior, de acordo co apartado 4, letra i) do devandito artigo, quedan exonerados da constitución de garantía os beneficiarios das subvencións concedidas das que os pagos non superen os 18.000 euros.

O pago final realizarase no momento da completa xustificación pola Asociación vecinal de Donís do cumprimento da finalidade e demais condicións establecidas no convenio.

QUINTA.- Xustificación dos gastos

A entidade beneficiaria xustificará ante a Axencia Galega de Desenvolvemento Rural a realización das actuacións previstas na memoria técnica valorada por importe de vinte dous mil centro catro euros con dezaioito céntimos (22.104,18 €), dos cales 17.683,34 € serán financiados pola Axencia e 4.420,84 € pola Asociación vecinal de Donís.

A xustificación do cumprimento das condicións impostas e do seu custo deberá levarse a cabo de acordo co previsto nos artigos 28 e seguintes da Lei 9/2007, do 13 de xuño.

De conformidade co previsto na Lei 9/2007, de subvencións de Galicia o prazo de execución e xustificación rematará o **15 de outubro de 2026**.

Se, transcorrido o prazo establecido para a xustificación da subvención, a entidade beneficiaria non presentase a documentación pertinente segundo o indicado no presente convenio, a Axencia Galega de Desenvolvemento Rural requiriralle, conforme ao artigo 45.2 do Regulamento da Lei de subvencións de Galicia, para que no prazo improrrogable de dez días a presente.

A falta de presentación da xustificación nos prazos establecidos nesta cláusula comportará a perda do dereito ao cobramento total ou parcial da subvención, a esixencia de reintegro e demais responsabilidades establecidas na Lei de subvencións de Galicia. A presentación da xustificación no prazo adicional establecido non eximirá ao beneficiario das sancións que, conforme á lei, correspondan.

A conta xustificativa da subvención presentarase electronicamente por medio do procedemento xenérico <https://sede.xunta.gal/detalle-procedemento?codtram=PR004A> e incluírá a seguinte documentación:

- Certificación emitida e asinada electronicamente pola asociación beneficiaria, relativa á aprobación polo órgano competente da conta xustificativa da subvención, na que se faga constar de forma detallada:





- Os distintos conceptos e contías correspondentes aos gastos totais soportados pola entidade beneficiaria imputables ao proxecto subvencionado, coa seguinte relación: identificación do acredor, número de factura ou documento equivalente, certificación da obra, importe, data de emisión e data de recoñecemento da obriga polo órgano competente.
- O cumprimento da finalidade da subvención.

- Facturas acreditativas das obras realizadas.
- Xustificantes bancarios do pago pola persoa beneficiaria (transferencia bancaria, xustificante bancario de ingreso de efectivo polo portelo, certificación bancaria), en que consten a data de pagamento, o número da factura obxecto de pagamento, o concepto facturado, a identificación da persoa que realiza o pagamento, que deberá coincidir coa beneficiaria da axuda, e a identificación do destinatario do pagamento, que deberá coincidir coa persoa, empresa ou entidade que emitiu a factura. Non se admitirán pagos en metálico, mediante cheque bancario nin mediante tarxeta de crédito ou débito.
- Certificacións de obra asinadas polo/a director/a de obra.
- Declaración que conteña unha relación detallada doutras subvenciones, axudas, ingresos o recursos que financien as actividades subvencionadas, así como a modificación das circunstancias que fundamentaran a concesión da subvención.
- Acreditación da colaboración da Axencia e da Xunta de Galicia (na publicidade das actuacións subvencionadas).
- Informe fotográfico das actuacións realizadas no que se constate tanto o estado previo ao inicio das obras como o resultado final, unha vez executadas estas.
- Certificado relativo á situación da entidade beneficiaria respecto o IVE no marco das actuacións realizadas en relación ao custo real soportado.
- Permisos, licenzas e autorizacións que resulten preceptivos segundo a lexislación vixente.
- Aclaracións ou informes relativos á xustificación do investimento que o órgano xestor considere convenientes.

A presentación desta información é requisito imprescindible para tramitar o pagamento.

En todo o relativo aos gastos subvencionables deberá cumprirse o disposto no artigo 29 da Lei 9/2007, de 13 de xuño, de subvencións de Galicia (modificado pola Lei 12/2011, do 26 de decembro, de medidas fiscais e administrativas).

No caso de que a entidade concerte con terceiros a execución total ou parcial da actividade obxecto do convenio, estarase ao disposto no artigo 27 da Lei 9/2007, do 13 de xuño, de subvencións de Galicia, e na Lei 9/2017, do 8 de novembro, de contratos do sector público.





No caso de que a Asociación vecinal de Donís non xustifique ou a xustificación sexa insuficiente, procederá a perda do dereito ao cobro da axuda e, de ser o caso, ao reintegro das cantidades percibidas e a esixencia do xuro de demora correspondente dende o momento do pagamento de subvencións ata a data na que se acorde a procedencia do reintegro.

Cando a actividade fose financiada ademais de con esta subvención con fondos propios ou con outras subvencións ou recursos, deberá acreditarse na xustificación o importe, a procedencia e a aplicación de tales fondos ás actividades subvencionadas. O importe das subvencións en ningún caso poderá ser de tal contía que illadamente ou en concorrencia con outras subvencións, ingresos ou recursos, supere o custo da actividade subvencionada. En caso de superar procederá o reintegro do exceso sobre o custo da actividade subvencionada así como a esixencia do xuro de demora correspondente.

Logo do control administrativo da documentación xustificativa das actuacións subvencionadas, efectuarase o pagamento final do expediente.

De acordo co establecido no artigo 64 do Decreto 11/2009, do 8 de xaneiro, polo que se aproba o Regulamento da Lei de subvencións de Galicia, as entidades beneficiarias poderán realizar, sen o requirimento previo da Administración, a devolución total ou parcial da subvención, mediante o seu ingreso no número de conta bancaria ES64 2080 0388 2531 1000 1412, da que é titular a Axencia Galega de Desenvolvemento Rural en concepto de «devolución voluntaria da subvención co número de expediente». En todo caso, a persoa beneficiaria deberá remitir a copia xustificativa da devolución voluntaria realizada, na cal consten a data do ingreso, o seu importe e o número de expediente e a denominación da subvención concedida. Para estes efectos, no texto da operación farase constar sempre o concepto da devolución con indicación do número de expediente.

SEXTA.- Causas de resolución

O incumprimento de calquera das cláusulas deste convenio constituirá causa suficiente para a súa rescisión, e así mesmo procederase o reintegro da subvención cando conorra algunha das causas previstas no artigo 33 da Lei 9/2007, de 13 de xuño, de subvencións de Galicia.

SÉTIMA.- Publicidade

As partes asinantes deberán cumprir coas obrigas derivadas da Lei 1/2016, do 18 de xaneiro, de transparencia e bo goberno. Para tal fin, as partes aceptan que o texto do convenio se publique no Portal de Transparencia e Goberno Aberto da Xunta de Galicia incluíndo os datos identificativos das persoas asinantes.

Así mesmo, a Asociación vecinal de Donís acepta e consinte a remisión do convenio, logo da súa sinatura, ao Rexistro de Convenios da Xunta de Galicia.

De acordo co establecido no artigo 30 da Lei 15/2014, do 16 de setembro, de racionalización do sector público e outras medidas de reforma administrativa, que introduciu diversas modificacións na Lei 38/2003, do 17 de novembro, xeral de subvencións, o contido deste convenio será publicado na Base de Datos Nacional de





Subvencións, nos termos recollidos no artigo 20 da Lei 38/2003, do 17 de novembro, xeral de subvencións, modificado polo artigo 30 da Lei 15/2014, do 16 de setembro, de racionalización do sector público, e outras medidas de reforma administrativa.

Así mesmo, será obxecto de publicidade no Rexistro de Axudas, Subvencións e Convenios, ao abeiro do disposto no Decreto 126/2006, do 20 de xullo, e no Decreto 132/2006, do 27 de xullo.

OITAVA.- Xurisdición

En todo o non previsto no presente convenio será de aplicación a Lei 9/2007, do 13 de xuño, de subvencións de Galicia, e a súa normativa de desenvolvemento. Aplicarase con carácter supletorio a Lei 38/2003, do 17 de novembro, xeral de subvencións.

Será de aplicación a Lei 40/2015, do 1 de outubro, de réxime xurídico do sector público.

Este convenio ten natureza administrativa. A xurisdición contencioso-administrativa será a competente para o coñecemento de posibles cuestións litixiosas que poidan suscitarse como consecuencia del.

NOVENA.- Vixencia

O período de vixencia deste convenio será dende a súa sinatura e ata o 15 de outubro de 2026.

DÉCIMA.- Comisión de seguimento

Para o seguimento do convenio e da súa execución así como para propoñer solucións aos conflitos que poidan xurdir na aplicación e interpretación das cláusulas do convenio constituirase unha comisión de seguimento que estará integrada por unha persoa representante designada pola Asociación vecinal de Donís e a persoa titular da secretaría xeral da Axencia como representante designada pola Axencia Galega de Desenvolvemento Rural.

DÉCIMO PRIMEIRA.- Modificación do convenio

A modificación do contido do convenio requirirá acordo unánime dos asinantes e realizarase mediante unha addenda coa normativa aplicable.

DÉCIMO SEGUNDA.- Extinción do convenio

Os convenios extínguense polo cumprimento das actuacións que constitúen o seu obxecto ou por incorrer en causa de resolución.

Son causas de resolución:

- a) O transcurso do prazo de vixencia do convenio sen acordarse a prórroga do mesmo.
- b) O acordo unánime de todos os asinantes.
- c) O incumprimento das obrigacións e compromisos asumidos por parte dalgún dos asinantes.





Neste caso, calquera das partes poderá notificar á parte que incumpra un requirimento para que cumpra nun determinado prazo coas obrigacións ou compromisos que se consideran incumpridos. Este requirimento será comunicado ao responsable do mecanismo de seguimento, vixilancia e control da execución do convenio e ás demais partes asinantes.

Se transcorrido o prazo indicado no requirimento persistise o incumprimento, a parte que o dirixiu notificará ás partes asinantes a concorrencia da causa de resolución e entenderase resolvido o convenio. A resolución do convenio por esta causa poderá supoñer a indemnización dos prexuízos causados se así se prevé.

d) Por decisión xudicial declaratoria da nulidade do convenio.

e) Por calquera outra causa distinta das anteriores prevista no convenio ou noutras leis.

DÉCIMO TERCEIRA.- Notificación electrónica

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica).

Así mesmo, o interesado pode autorizar a calquera outra persoa a acceder ao contido das súas notificacións.

DÉCIMO CUARTA. Protección de datos

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación deses datos e polo que se derroga a Directiva 95/46/CE (Regulamento xeral de protección de datos), da Lei orgánica 3/2018, do 5 de decembro, de protección de datos persoais e garantía dos dereitos dixitais, do Real Decreto 1720/2007, do 21 de decembro, polo que se aproba o Regulamento de desenvolvemento da LOPD, e demais normativa vixente de aplicación en cada momento en materia de protección de datos.

Este convenio obriga ás partes que o asinan ao seu cumprimento, e ambas as dúas sométense ao acordado en tódalas estipulacións.





E en proba de conformidade, asínase o presente convenio no lugar e data que figura no mesmo.

María Paz Rodríguez Rivera
(P.D. Acordo do Consello de
Dirección do 17.06.2026)
Directora xeral da Axencia Galega
de Desenvolvemento Rural

Marcia Leticia Pereira Palomino
Presidenta da Asociación vecinal
de Donís





ANEXO I

ORZAMENTO:

Capítulo	Resumen	Importe
1	Roza e acondicionamento do terreo	3.143,50 €
2	Peche perimetral	3.189,42 €
3	Mobiliario	10.556,00 €
4	Axardinamento	532,00 €
5	Outros	847,00 €
Total execución material		18.267,92 €
IVE (21%)		3.836,26 €
Total		22.104,18 €

